

## Յիշատակի Օր

### Անմահ Բարերարների Կարապետ եւ Գրիգոր Մելգոնեան Եղբայրներու

Մելգոնեան Կրթ. Հաստատութեան Նախկին Սաներու կողմէ

Կիրակի, Յունուար 17, 2010-ին Փասատինայի Ար. Գրիգոր Լուսաւորիչ եկեղեցւոյ մէջ, յաւարտ Ար. պատարագի, հոգեհանգստեան արարողութիւն կատարուեցաւ ի յիշատակ Մելգոնեան Կրթ. Հաստատութեան անմահ բարերարներ՝ Կարապետ եւ Գրիգոր Մելգոնեան եղբայրներուն: Եկեղեցւոյ մէջ յարգանքի տուրք մատուցելէ ետք, աւելի քան հարիւր Մելգոնեանցիներ եւ բարեկամներ ուղղուեցան մօտակա Աթթաւէնայ քաղաքի ՀԿԲՄի Կարօ Սողանալեան հանդիսասրահը ուր տեղի ունեցաւ հոգեճաշի եւ յիշատակի հանդիսութիւնը:

Մելգոնեանցիներուն համար աւանդական դարձած յարգանքի այս օրը, այս տարի աւելի պատկառելի շուք ստացաւ այն երեւոյթով որ նախկին Մելգոնեանցիներու կողքին, բարերարներու յիշատակը յարգելու նպատակով ներկաներու մէջ կը գտնուէին վարժարանի բազմապատասխան ու մեծատաղանդ նախկին ուսուցիչներ՝ Երգահան խմբավար, արուեստի մեծն նուիրեալ Պրն. Սեպուհ Աբգարեանը եւ Հայ գրականութեան եւ Հայ լեզուի մեծագոյն մասնագէտներէն, Դոկտոր Արտեմ Սարգիսեանը, Մելգոնեան Վարժարանի նաղկին Ուսուցիչ մայր հայրենիքէն:

Հանդիսութիւնը սկսաւ Մելգոնեանի քայլերգով առաջնորդութեամբ Պրն. Սեպուհ Աբգարեանի: Մելգոնեան Սանուց եւ Բարեկամներ Միութեան ատենապետ Պրն. Ռաֆֆի Յնձալեան ողջունեց ներկաները եւ հակիրճ ներկայացուց վարչութեան անցնող Տարուան ընթացքին Կատարած աշխատանքները, յետագայ ծրագիրները եւ վարչութեան կազմէն ներս նոր անդամներու յաւելումը: Ան բոլորին յայտնեց Սանուցի աւանդական ճաշկերոյթ պարահանդեսին մասին, որ կը նախատեսուի տեղի ունենալ Մարտ ամսուան մէջ, Պրանտիէլ Գոլլէգոյի Պանխըլէր սրահին մէջ: Բարի գալուստի



խօսքերէն ետք, թեմ հրաւիրուեցաւ Դոկտոր Արտեմ Սարգիսեան: Պրն Սարգիսեան կարօտով յիշեց Մելգոնեանի մէջ դասաւանդութեան իր չորս տարիները, յուսալով որ մօտիկ ապագային Մելգոնեան Վարժարանը վերաբանայ իր դռները նոր գալիք սերունդներուն առջեւ: Ան ներկաներուն նուիրեց իր նոր լոյս տեսած, բազմահատոր գիրքերէն օրինակներ, ուր՝ ծաւալուն էջեր նուիրուած են Մելգոնեանի եւ Մելգոնեանցիներուն:

Յաջորդ բեմ բարձրացողը՝ մեծանուն երաժիշտ Սեպուհ Աբգարեանն էր: Պրն. Աբգարեան իր յաճելի ձայնով դրուագներ պատմեց հին օրերէն: Յատկապէս տպաւորիչ էր այն, թէ ինչպէս տասնեակ տարիներ շարունակ իր աշակերտներուն գեղանկարչական գործերէն մաս մը որ ինք շարունակ մասունքի նման խնամքով պահած էր, իր հետ բերած ըլլալով զանոնք յանձնեց տէրերուն որոնք սրահին մէջ ներկայ էին:



Արժեքները ու հարստութիւնները պահպանելու նիւթը շարունակելով,

կարճ ելոյթ ունեցաւ նախկին ուսուցիչ Դոկտոր Մինաս Գոնձայեան: Ան հարց տուաւ թէ ուր անհետացան Մելգոնեանի մատենադրանի բազմաթիւ արժեքաւոր մատենաները, պատերը զարդարող թանկարժեք իւղանկարները, օրինակ՝ մեծանուն գծագրիչ Մելգոնեանցի Յակոբ Յակոբեանի գործերը, եւ ուրիշ շատ մը հարստութիւններ:



Ելոյթ ունենալու առիթ տրուեցաւ նաեւ վարժարանի նախկին սան Պրն. Մեսրոպ Թաշճեանին: Մեսրոպ Թաշճեան, կրթական մշակ ըլլալու կողքին, ունեցած է նաեւ երաժշտական յաջողութիւններ, հրապարակելով միքանի ձայնապնակներ:

Ան նախ կատարեց երգ մը՝ «Փոքրիկ Տղան», որ սորված էր Մելգոնեանի մէջ, ապա բոլոր ներկայներուն նուիրեց իր ձայնասկաւառակէն մէկական օրինակ, խնդրելով որ ստացողները նուիրատուութիւն մը կատարեն Մելգոնեան Սանուց եւ Բարեկամներ Միութեան:



Հոգեճաշ հանդիսութիւնը փակուեցաւ Պրն. Զօհրապ Ծամմասեանի ելոյթով: Պրն. Ծամմասեան որ Մելգոնեան Աշխարհասփիւ Սանուց Միութիւններու մամուլ համադրողն է, յայտնեց թէ աշխարհի տարբեր երկիրներու մէջ այժմ լուրջ աշխատանքներ կը տարուին, Հայ հարուստ գործատէրերու կողմէ, Եւրոպայէն, Ռուսաստանէն եւ Հայաստանէն, Մելգոնեան Կրթական Հաստատութիւնը վերաբանալու հարցը: Ի դէպ, «Այբ» Կրթական Հիմնադրամի քննարկման նիւթ եղած է Մելգոնեան Հաստատութիւնը եւ մշակած են անոր վերաբացման հայացակարգ:

«Այբ» Կրթական հիմնարկը այսօր Երեւանի մերձակայքին մէջ ծրագրած է հիմնել կրթական լրիւ աւան մը ուր պիտի յաճախեն 800 աշակերտներ եւ այս նպատակին համար հանգանակուած է քառասուն եօթ միլիոն Ամերիկեան տոլար: Նմանօրինակ հաստատութիւն մը հիմնելու ծրագրին մէջ նկատի ունին Մելգոնեան Կրթական Հաստատութիւնը, հաշուի առնելով անոր աշխարհագրական մերձակայութիւնը Եւրոպայի, Միջին Արեւելքի եւ Հայաստանի որը ապագային պիտի դառնայ խորհրդանիշը Հայրենիքի եւ Սփիւռքի Միասնութեան: «Այբ» Կրթական հիմնարկը յարաբերութեան մէջ մտած է արդէն ՀԲԸՄ կեդրոնին հետ

համաձայնության մը գալու միտքով: Պր. Շամասեան նշեց թէ՛ թէև Մելգոնեանի Աշխարհացրի Սանուցները ունեցան կարգ մը ձախողութիւններ, բայց պէտք չէ վհատիլ, միշտ պէտք է հաւատք, յոյս եւ երազ ունենալ մեր նպատակին հասնելու համար ու ձգտիլ մեր վարժարանի՝ « լուսոյ անշէջ վարարանի» վերաբացման:

Մելգոնեանցիները ամրապնդուած ու վերանորոգ յանձնառութեամբ հեռացան սրահէն:

Բժիշկ Արա Իսգիկեան

